

DÍDZA'DO' BUZÚAJĚ' JUDAS

Judas rugapě' Dios nupa nulidzě' Dios

1 ¹ Neda', Judas, tsaz naca' huen dxin queě' Jesucristo, en naca' ca' bóchě'ě Jacobo. Rugapa' Dios libí'ili', nulidzě' Dios Xuz libí'ili', en nadxí'ině' libí'ili', en rapa chi'ě libí'ili' tu' nácali' tuz len Jesucristo. ² Ré'ěnda' inózili' ca ruhuéchi'da' ládxě'ě Dios libí'ili', en nadxí'ide'eně' libí'ili', enca' ruzóadě'ě dxi icja ládxi'do'oli'.

Nupa tu'sedi le cabí nácatě

³ Libí'ili', böchi' luzá'ado', gúcada' ládxa'a uzúaja' queéli' lu guichi ca naca yöl-la' rusölá nadéli'ru', pero run bayudxi uchízia' icja nágali' para idú ládxi'li' tíl-lalenli' nupa ta'dá'baga' le réajlě'ěru'-ně' Dios, lě na' budödě' Dios tsaz lu ná'agaca nupa néquiguequi quez queě' para ulu'zě didza' que lógaca yúgu'tě bönachi. ⁴ Caní run bayudxi guna' tu' bagáchi'sö chigula'yázaleně' bal-lě' bönni' rě'u, Dios buzóě' quégaquiě' dza ni'te ichúguiě' quégaquiě' ila'nítiě' tsaz. Biti' ta'yéaj ládxi'gaquiě' Dios bönni' caní. Tu' zoa le ruzá' ládxě'ě Dios queéru', téquině' huáca iluně' le ruá' dö'. Ta'dá'baguě'ě Xanru' Jesucristo. Tuzě' Lě' rinná bé'eně' rě'u.

⁵ Chinóz quézili' lě ni, pero ré'ěnda' usá'a ládxi'li' ca beně' Xanru' Dios. Sal-la' busölě' bönachi Israel cate' bubéajě' léguequi luyú Egipto, gudödi ni' busunítiě' nupa bítsa'gaca ládjaguequi, en biti' gula'yéajlě' Lě'. ⁶ Lěsca' caní, yugu' gubáz lá'ayi queě' Dios, nupa ni' biti' gulún xichíngaquiě', pero bulu'cá'aně' xilátjagaquiě', Dios busayjě' légaquiě' tu lataj chul-la. Nága'gaquiě' tsaz ni' ga idxinrö dza usiúdxě' Dios yödzölió ni. ⁷ Lěsca' caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' guluně' gubáz lá'ayi na', gula'dá'baguě'ě Dios, lěsca' caní guluně' bönni' yugu' lu yödzö na'. Bulu'dödi cúngaquiě' para guluně' le ruá' dö', en le gula'zēsö ládxi'gaquiě' le tun ga nu rutuí'i. Na'a, tu' busaca' zi'ě Dios légaquiě' lu guí' le cabirö ulu, lě na' guca quégaquiě' naca tu le run gadxi yúgu'těru', para cabí gunru' la' lébisö.

⁸ Sal-la' gulaca lě ni, la' canísö tuně' bönni' ni, bönni' rōjácaleně' yēla ta'néně'. Tun dítjaně' idútě le naca cazě'. Ta'dá'baguě'ě le rinná bé'eně' Dios rě'u, en ta'nně' zi'ě quégaca nupa ta'nná bē' yehua' yubá. ⁹ Miguel caz, gubáz lá'ayi lo, cate' gudíl-laleně' tu' xihui' para gaca u'ě idú le naca cazě' Moisés, biti' burúguině' udxí'ě dö' tu' xihui' na', pero gudxě' le: "Xanru' uzeně' li' bach." ¹⁰ Yugu' bönni' ni ta'nně' zi'ě quégaca le runě' Dios, yugu' le biti' ta'yéajni'ině', ate' yugu' le ta'yéajni'ině' rácasö

quégaquië' ca na' tunba' böa' guixi' biti' ta'yéajni'iba', lë ni tu'gunë' dxin, en caní tu'dxía dö' cuíngaquië'.

¹¹ Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguië' Moisés. ¹² Yugu' bönni' ni tágulenë' tsözxón libí'ili' cate' ráguli' yugu' güi'i huagu lu yöl-la' nadxí'i queéli'. Tunë' ga ta'chixi ta'nigui nupa dzágagaca libí'ili', tu' tē'aj tagu lizë'. Nácagaquië' ca yugu' bönni' ral-la' ulu'gágugaquië'-ba' bö'cu' zxila', pero la' cuíngacasë' tu'gahuë'. Nácagaquië' ca böaj lúzxiba biti' nachë'gaca nisa, ate' ruá' bö' léguequi ná'alö ní'ilö. Nácagaquië' ca' ca yugu' yaga chibidxín dza bi ila'bía, pero biti' bi ta'bía. Nácagaquië' ca' ca yugu' yaga chigula'bidxi idú luí, en chinaládzugaca. ¹³ Nácagaquië' ca' ca nísado' cate' riyasa ridxía, ate' ribö' bidxina' que, lë na' ruluí'i ca naca yöl-la' stu' tunë'. Nácagaquië' ca yugu' bölj lúzxiba nucá'anagacaba' xinózgacaba'. Dios chinunë' quégaquië' ila'yázië' tsaz lataj chul-la.

¹⁴ Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cö' zxí'ini xi'söë' Adán. Gunnë': "Buli'yútsöca', zë'ë Xanru', ate' dzágagaca Lë' zían gayuá' bönachi néquiguequi quez queë'. ¹⁵ Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zi' gula'nnë' bönni' dul-la' na' queë' Lë'. ¹⁶ Yugu' bönni' caní ta'nnë' queë', en ta'zí' quídzë'ë, en tunë' ca naca le ta'zësö láchxi'gaquië'. Tu'ë didza' lu yöl-la' run ba zxön cuíngaquië', en para ulu'zi'ë xibéguequi, tu'ë didza' le ta'gú'u bönachi yöl-la' zxön.

Judas rusé'ë láchxi'gaca nupa ta'yéajlë' Cristo

¹⁷ Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. ¹⁸ Yugu' bönni' na' gulé' libí'ili': "Yugu' dza tsöjsétëgaca ulu'luí'i lógaquië' bönni' ulu'titjë' le naca lá'ayi, en ilunë' ca naca le ta'zësö láchxi'gaquië' le ruá' dö'." ¹⁹ Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en biti' zóalenë' Dios Bö' Lá'ayi légaquië'.

²⁰ Na'a, böchi' luzá'ado', guli'sóa tsutsu lu yöl-la' réajlë' queéli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. ²¹ Buli'gá'analenë' Dios, Nu nadxí'i rë'u, en guli'cöza dza ni' ulu'í'i lahuë' Xanru' Jesucristo, Nu ruhuéchi' láchxë'ë rë'u para gata' yöl-la' na'bán idú queëru'.

²² Guli'gún ga ila'dipa láchxi'gaca nupa raca chopá láchxi'gaca.

²³ Guli'gún ga ulu'lé', le gaca tsca ubéajli' légaquië' lu guí'. Lu yöl-la' radxi queéli' buli'huéchi' láchxi'li' ia'zica'rö bönachi. Guli'gún chi'i

cuinli', para cabí gunli' tsözxón légaquië', en cabí gútsa'li' le ruá' dö' tunë'.

Le rigú'uru' Dios yöl-la' zxön

^{24,25} Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzéjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!